

Special

Awe ken nan ta

Skirbi pa Roland W. Peterson

Cu cara na laira nan a kana den parada.
Cu brasa fuerte y man duru nan a carga e arma
Cu orguyo y dignidad e bandera.
Nan tabata hopi.
Awe hopi di nan no tei mas.
Pero awe ken nan ta?
Ta bon pa no lubida.

Tur aña e grupu ta bira mas chikito.
Ta bai bin un dia cu ningun di nan tei mas.
Hopi di nos ta muchu hoben, nos no conece nan.
Si bo menciona nan nomber tampoco bo no sa ken nan ta.
Pero nan a defende, nan tabata para kla pa muri pa nan isla.
Pero awe ken nan ta?
Ta bon pa no lubida.

Nan a nabega riba e tankeranan y barco di guera
Nan a wordu torpedia.
Su cuero di lomba a keda pega contra e cement.
Pero awe ken nan ta?
Ta bon pa no lubida.

Nan tabata disciplina y respeta pasobra nan tabatin e
mentalidat y boluntad pa traha y defende.
Deber prome cu placer., nunca nan a duda den e causa
Pero awe ken nan ta?
Ta bon pa no lubida.

Den temporada peligroso cu anochinan scur y largo
nan tabata tene guardia sin cu bo tabata sa.
Nan a wordu captura y nan a wordu fusila.
Pero awe ken nan ta?
Ta bon pa no lubida.

Awe nos ta pone un flor pa recorda,
Pa recorda e curashi, mentalidat, disciplina y boluntat
pa defende y keda liber
Ta dor di nan heroismo nos ta aki awe.
Pero awe ken nan ta?
Ta bon pa no lubida

Awe ta bon pa hanya sa ken nan ta.
Pasobra ta bon pa perdona, pero nunca ... nunca ... lubida.